



OPOREZIVANJE TEHNIČKIH REZERVACIJA

Bosna reosiguranje d.d. Sarajevo smatra da je oporezivanje tehničkih rezervacija neopravdano, jer se prije svega radi o obaveznom postupku formiranja rezervacija koji kao isključivi cilj ima zaštitu osiguranika ili korisnika odštete na način da rizik čije pokriće prelazi u narednu godinu ima izdvojenu premiju kojom će se pokrivati eventualno nastale štete (prijenosna premija) ili rezerve za pokriće nastalih šteta, poznatih ili još nepoznatih (rezerve šteta). U svakom slučaju, izračun se mora obavljati prema pravilnicima određenim od strane Agencije za nadzor osiguranja FBiH, i to od strane licenciranih aktuara, tako da ovo oporezivanje predstavlja namet na obavezu koja je propisana, a direktno utječe na to da osiguranik možda neće moći, zbog umanjivanja rezervacija usljed oporezivanja, dobiti odštetu u cjelosti. Pri tome još je veća devijacija i ugrožavanje isplate odšteta oporezivanje pojedinih stavki umjesto konačnog efekta promjena unutar pojedinih stavki rezervacija. U svakom slučaju, ovo predstavlja i prikriveno oporezivanje premije, koja je, barem zvanično, oslobođena oporezivanja.

Dodatni problem je porez po odbitku, koji je uveden nakon sklapanja Sporazuma o stabilizaciji i pridruživanju. Nažalost, ovaj Sporazum još uvijek nije na snazi, te stoga uvođenje poreza po odbitku ima opravdanje za svoj legalitet, ali sasvim sigurno je protiv onoga što je Sporazum precizirao, a to je da nema pogoršanja položaja strana potpisnica nakon njegovog stupanja na snagu.

I porez po odbitku predstavlja posredno oporezivanje premije osiguranja koja je navodno i zvanično oslobođena oporezivanja, a ujedno stvara ponovni namet u pogledu nečega što vlast postavlja kao obavezu, a to je reosiguranje viška rizika. Istovremeno, ovaj porez umanjuje konkurentnost ili u potpunosti isključuje mogućnost sudjelovanja domaćih društva za reosiguranje iz međunarodnih poslova, čime se – svjesno ili ne – onemogućava izvoz usluga a prednost stječu društva iz regije, uz isključivanje mogućnosti plasmana rizika na neka od najvećih tržišta osiguranja i reosiguranja u svijetu (Švicarska, SAD, Japan, te npr. Austrija kao značajno regionalno tržište).

Bosna reosiguranje se zalaže za hitne promjene propisa vezanih uz oporezivanje tehničkih rezervacija i poreza po odbitku i uređenje ove oblasti u skladu sa pravilima važećim u EU.